

Hebreos

Tius Nusrkaingurri waminding

1 ¹Merrabsrømbe Tiusbe namui kōlli misaamerane Tius maig karuigwan eshkabeløgurri, mumay køben, katø katø waminding købig køn. ²Incha mõi i srabe kwalømmerawane nui Nusrkaingurri namun wamindan. Tru pirøwanba, katø srømbalasrø kerrigu chigurrimbunø købigwanbañau Tiusbe nøgurri mara pasrøb, katø nundøwei tru chigurrimbunø pønrrabigwan kerrigu keta, nø ashib tøgagønrrai kørrømarig købig køn. ³Nusrkaimbe Tius maig törguegwalmabig køben, treetøwei tørig törguegwalmabig køn, chiyutøgucha Tius maig køben nø treetøweingue. Katø nøbe tru chigurrimbunø pønrrabigwane nui maramburab mari wamdøga trunun nø ashib tøga pasran. Incha nøbe misaamerai kaig mariilan chab chishmarabe, yandø srømbalasrø Tørbilabig Purø Nu Tiuswei kusrmaygatø wanrrab wamisrig køn.

Tiuswei Nusrkaimbe ángelesmera lataguen kømø, purab nuig køn

⁴Pøs øyamay Nusrkaimbe ángelesmera lataguen kømø, purab nuig misrig køn, “Tiuswei Nusrkain” cha, wami munchin nø uta tøgagúibe, “ángeles” cha wami munchi lataitøguen kømø, purab nuig utig køb lataitøwei. ⁵Pøs Tiusbe kan mø ángelwan køben managuen øyeebe chimuig køn:

“Ñibe nai Nusrkain køn cha;
nabe mõi ñui Møskai misrar” cha.

Katø mø ángelwangucha øyeege chimuig køn:

“Nabe nui Møskain køben,
nøgurrimbe nai Nusrkain kønrrun” cha.

⁶Incha Tiusbe nui kandø Nusrkawan yu pirau kebattraí ørøb urasma katø trendaig købig køn:

“Tiuswei ángelesmerabe mayeeløba nun køriibala tabig wamindamig køn” cha.

⁷Inchen tru ángelesmeraimburappe Tiusbe trenchibig køn:

“Nui ángelesmerane kan isig ichibig latailø kønrrai maran cha,
katø nuiwan marøb melabelane nag pilabelø latailø kønrraingue.”

⁸Trune Tius Møskaimbe tru Nusrkaweimburappe trenchibig kòn:

“Ñi, Tius, ñi ashib karub wamisra waibe
managatig pasrabig pasrøben,
tru tabig sølgandø marøb tøgaweim pørøtsiibe
ñi ashib karub wainug sølgandø marøb waig,
truig kønrrun cha.

⁹Sølgandø tabigwane ñibe undaarawa,
kaigwane ashig kømui indig kòn cha.
Incha treekkurri Tius, tru ñui Tiusbe,
tru ñui linchibelan lataguen kømø,
purab nuig kønrrai mara,
ñune aceite srølig kòn cha
maya nuguen kasraaranrai.”

¹⁰Katø Tiusbe Nusrkawan trenchibig kòn:

“Ñi Señorbe srøsrøzhiitø pirøwane
ñi mara pasrig køben,
srømbalamerabe kerriguba ñui tasiitøga mara
pønsrailø kòn cha.

¹¹Inchen truiløbe kerriguba chab pinøben,
ñibe wabig wanrrun cha.
Srømbalamerabe kerriguba asru kewagúilø lataitøwei
chab kølliranrrun cha.

¹²Ñibe tru srømbalamerane kan pala itø tsinigwan welan kitishib
lataitøwei kirra,
kewagúilan lataitøwei katøle peemay
srøig yunømartrun cha.
Trune ñibe chu uraskucha yunømarmø,
treetø treetø køben,
ñi øsig wamig pilamerabe managuen patsønrraamøn” cha.

¹³Tiusbe mø ángelwan køben managuen trendaig kaagøn:

“Nai kusrmaygatø wamisr cha,
ñun ashig kømui inchib tsalø inchibelan
ñi ñui srøbmeran truilaim pala nebuna
wamig kønrrai pønsramnegatig.”

¹⁴¿Angelesmerabe mayamba espíritumera, Tius karuigwan marøb
pønrrabelø, kaigygurri wesraig kømigwan ketig uta tøgagønrrabelan
purugub pønrrønrrai karua øriilø treelø kømuitarru?

**Kaigygurri wesraig tøga pønrraigwan
chinchaindø elatsamig kømøn**

2 ¹Inchawei treeg købene, nam wamindi mørigwane mas tab møramig
palan, nam amønaig mayugurri inchippa pella ambinabgunmab.

²Kaguende Tius ángelesmeragurri wamindikken maig chippe, treeg kónrrain kuig kua, tru maig taigwan mórøg kómub itøbunabelanba, móra marmeeulanba truburø móra melamigwan maig utamigwan utónrrai pónsraig købig kón. ³¿Namun kaigyugurri wesraig yeeg nuig tøga pónrraigwan nam chinchaindø elacha, amõñabe, trube, nambe tru móra melamigugurrimbe, mandø incha wegõrrõnrrab? Kaguende kaigyugurri wesraig kómig purø nuigwane Señor Jesús nõashib nõmerrig eshkaben, trugurrimbe tru nõ wamindigwan mórøbelø, truigwane ‘øyeeg kón’ cha, namun eshkaig købig kón. ⁴Katø Tiusbe nõ pasrain kui ashchai mariilõtøgaba, kwaara asha kónrrai mariilõtøgaba, maramburab mariilõtøgaba, Espíritu Santogurri peg, peg marøbelø kónrrai nun maig tranamdiig køben pirisha keta traniitøgaba, tru wamindigwan Tiusbe treeg kuin kui ashchai kenamarøb pasraig kón.

Jesucristo kón nam kaigyugurri webamba pónrramibe

⁵Nam mõi tru waminchib amrruigwan, waramig katøgan tru wendøsrø srøig attrabigwane ángelesmera nõm karub tøgagõnrrai, Tiusbe treeg marig kómøn. ⁶Treeg kómõtø, kanbaløsrø Tiuswei wamwan pøriguma mõikkøsrøn Tiuswan trencha payig kón:

“¿Misaabe ñuimbe chi kónrrab køh cha,
ñi ya isunrraimbe?

¿Ka mowandø ñi truba isua ashib attraimbe,
nøbe chi køh cha?

⁷Pøs kan maya yanagatiitø ángelesmera lataitøguen kómø,
møwane katøguchindø lamíig kónrrai mara,
nune maya nuguen tabig indiitøgaba,
purø tab indiitøgaba,

treetøga corona petsøsrøb lataig purø nuig kónrrai marig kón cha.

⁸ Incha kerriguba nui srøb umbu pónsraig kón” cha.

Incha kerriguba nui srøb umbu pónsrøppe, Tiusbe chiwan kørømara kómõtø, kerriguba nõ ashchai pónsraig kón. Treeg kuingucha, mõi yambatøbe kerrigubabe møg nõ ashib tøgagømuin kui aser. ⁹Inchendø Jesúswane, kan maya yanatø ángelesmera lataguen kómø, katøguchindø lamíig kónrrai marin kui aser, Tius tru ka yandø tab indikkurri mayeelayasig kwamigwan maig kuig mórøb pasramig kónrrai. Møimbe tru nõ kwaikkurri tørguegwalmabiitøgaba, purø tab indiitøgaba, treetøga kan corona petsøsrøb lataig marig kón.

¹⁰Pøs tru chigurrimbunø pónrrabigwan marøb, katø truilan nuyasiitøwei pónrrõnrrai marøb inchib Tiusbe nui uremeran truba nõrrõwan nui tørguegwalmabiisrømay pera ippe, Tiusbe tru Jesucristo nõmerrig nõmun kaigyugurri pera webibigwan tru chine kaig indinab pureb megaitøga chi palømíig newanig kónrrai maramig, Tiusbe søl kui asig kón. ¹¹Kaguende Cristo tru Tiusweindø kónrrai tarømarøbig lata, katø Tiusweindø kónrrai

tarømariilø lata, mayeeløba kan Møskaweyeløtø køn. Inchawei treekkurri Jesúsbe nømune, “nai nunelø” cha, wamamig chi kørig kuim pasrømøn.

¹²Tiuswei wamwan pøriguma Cristobe Tius Møskawan trenchibig køn:

“Ñui munchiwan nabe nai nunelan wamindamønrrun cha.

Incha ñuielø tulundzuna kuinug mayanguen tabig waminchib cantamønrrun” cha.

¹³Katø Cristobe treekkucha chibig køn:

“Nabe ke Tiuswandø isua pasramønrrun” cha.

Incha katø trendaig køn:

“Tius nan trani ureemeraba nabe yu pasrar” cha.

¹⁴Pøs ureemerama asr tøgær, animbar kuig købene, Jesucristogucha treeg asrtøwei tøgæg kørrømisrig køn, nø kwaitøga tru kwamig kønrrai nugwaimandzig mu chindamgaig marøb pasrabigwan pinishib, ¹⁵katø nømui øsig amønaigu chu urastøgucha tru kwamigwan kørig kuindø, kørig kuindø melabelan truyugurri wesrailø kønrrai marøb inchab. ¹⁶Pøs nøbe purugumma, ángelesmeran purugumøtø, tru Abrahamweinukkurri amrrub misaameran purugun. ¹⁷Inchawei treekkurri chiyutøgucha nui nunelø Tiuswei misamera lataitøwein kømig kuig køn, kan maya Sacerdotesmeran Nø karub Sacerdote lastima ashibig kømigwanba, katø Tiuswei merrab maig maramigwan elachimø marøb pasrabig kømigwanba, treeg kønrrab, incha tru maya misagwei kaig mariilan chi ulø payamig kømønrrai kweetsigwan tranrrab. ¹⁸Pøs chiyugøben kebenørkønrrab indinab nøtøweinguen yeeg chine kaig indinab megabikkurri, chiyugøben kegørrønrrai indinab melabelan purugumig nøbe maramburab marøbig køn.

Jesucristobe Moisés lataitøguen kømø, mas nuig køn

3 ¹Inchawei treeg købene, ñim, nai nunelø, Tiusweindø tarømariilø, nø srømbalarøngurri wamigwan ñimgucha lata tøgagønrrai wamiiløbe, Jesúswan, Tius tru Nøashib Karua Ørig, katø tru Maya Sacerdotesmeran Nø Karub Sacerdote tab isua asay, tru nam nun kørewa pønrrer taigu truyutø pønrraigwan. ²Pøs Jesúsbe nun wesra pasrøbig Tiuswan kerriguba maig taigwan møra marig køn, Tiuswei misag israelitasweimburab Moisés kerriguba chi maramelan elachimø, marøb pasrab lataitøweingue. ³Inchendø Jesúsbe purabguen tab indig køn, Moisés lataguen kømø, kan ya marøbigwan mas tab indig køn, tru yawan lataguen kømø. ⁴Pøs chi yatøgucha pasrappe, mugøben marigweim pasrainrrun. Inchendø lutøgurri chiwandøgucha mara pønstrøbiibe, Tius køn. ⁵Pøs Moisésbe maramigu marøb megabig køppe, israelitasmera Tiuswei misagweimburab kerriguba chi maramelan elachimø, marøb pasraig købig køn. Incha wendøsrø Tius wamindig kønrrabigwan nøbe kenamarøbig køn. ⁶Trune Cristobe, nø Nusrkain kua, Tiuswei yau chi maramelan elachimø marøb pasran, kerriguwan nø ashib. Inchen tru yabe

namdøwein ker, treetøgucha nam kullaaramø mur pønrramigwanba, nam truba tab kui mørøb isua munig melaigwanba elachimø, nam tøga pønrrabig pønrrøwabe kønrrun.

Tiuswei ureemerabe israb purramig tøgar køn

7 Inchawei Tiuswei wamwan pørigu Espíritu Santobe øyeeg taig køn:

“Ñim møin kwaløm Tius maig taigwan mørabe,

8 mørøg kømui inchib ñimui manrrømeran mur marmøtay cha, tru mu misag warab waraimønug Tius maig taigwan ñim mørøg kømub namig inchib kurrab uras,

Tiuswan ke chinchibig køtashchab inchib lataitøwei,

9 tru ñimui merrabsrø kølli misaamera nan truyu ke chinchibig køtashchab lataig inchib namisainug,

tru cuarenta años ørøba na yeeg chigøben mariilan ashatøgucha.

10 Inchawei treekkurri tru uras misaameran nan namig køben, na trendaig købig køn: ‘Nømui manrraube chu uraskucha ka pellatø, pellatø pønrrabelø kua, nai maymeran ashmeelø kuig køn’ cha.

11 Inchawei nabe nømun namig køben, jkatø! treeg kønrrun cha, trendaig kuig køn:

‘Isramig na tøgagúinug nømbe managuen kebamrraamøn’ ” cha.

12 jAu, nai nunelø, ashiptø kuy! Ñimui utu møikkøben Tiuswan køremø kaig manrrø tøgag kua, Øsig Wab Tiuswan tarømisrøb megabgunmab.

13 Masken treeg kømøtø, kangurrin kangurri øyamay meløgun chib kwalømmørig puruguyay, Tiuswei wamwan pørigu tru “Møin Kwaløm køn” taig truig pasrøbenbatø, pøs kaig maramibe ñimun truba tabig asønaben, ñim møitøgucha larrø mormíig misra pasrømønrrappe. 14 Kaguende Cristoba namgucha tøgatø melamigwan tøga pønrrer, treetøgucha tru srøtø ke truyu isua pønrraigwan srabegatig tøga pønrrøwabe kønrrun.

15 Inchawei Tiuswei wamwan pøriguma trendan:

“Ñim møin kwaløm Tiuswei wamwan mørabe, ñimui manrrømeran mur marmøtay cha,

Tius maig taigwan mørøg kømub itøbunab uras lataitøwei.”

16 jInchen tru Tiuswei wamwan mørendø, Tius maig taigwan mørøg kømub itøbunabeløbe mumera kuig køh? jMoisés tru Egipto piraugurri mayeelan pera webarrig, truilø kømuitarru? 17 jInchen tru cuarenta años ørøba Tiusbe mumeranre tab kømui waig køh? jTru kaig marøbelø mu misag warab waraimøsrø kwabelø, truilørre namisaig kømuitarru?

18 Incha Tiusbe tru isramig nø tøga wainug, “jKatø! kebamrraamøn” cha. Trenchippe, pøs jmumeran kui trenchinrrab kø? Pøs tru mormeelan nømunwein kuig køn. 19 Inchawei nømbe kebamrrab kaimaig kuin kui aser, kaguende kørenrrab inchimeelø kuikkurri.

4 ¹Pøs treeg købene, tru isramig Tius nø tøgagúinug nam kebambamigwan tøgagønrrun cha tranrrrab misra korrømisrig pasrøbenbatø, trunune purø isuptø tōga amønamiḡ køn, inchippa ñim mõikkøben kebammubgunmab. ²Kaguende tru misag warab waraimøsrø mørøḡ kømui inchibelan lataitøwei namungucha Tiuswei tabig srø wamwan wammørøsrkaig købig køn. Inchendø tru wamwan nõm wamindi mōriibe chiweingucha chi purugumuig køn, kaguende tru mørøbeløbe isubigwan Tiusweinug pasra mørmuikkurri. ³Inchendø tru nam kørebelaimbeguende tru isramig Tius nø tøgagúinug kebambubwei indamønrrun. Incha kua, Tiusbe trendaig køn:

“Nabe namig køben, ¡katø! treeg kønrrun cha,
trendaig kuig køn cha:

‘Isramig na tøgagúinuube nõmbe managuen kebamrraamøn’ ” cha, nui chi marameløbe pirøwan chi købigwanbañau chab mara, tru isramigwane tru urasrøngurri pasrig kuindøgucha. ⁴Pøs Tiuswei wamwan pørigu kanbaløsrø tru kwalømmerna siete nemisrøbigweimbura trendaig køn:

“Nui chi maramelan chab mara, kwalømmerna siete nemisren Tiusbe isrig køn” cha.

⁵Mira chab trendainuuma katø trenchibig køn:

“Isramig na tøgagúinuube nõmbe managuen kebamrraamøn” cha.

⁶Inchen truilø kømøtø, katøganeløbe katøgucha isramig tru nø tøgagúinug kebambamig palab melan. Tru tab wamwan tru srøsrø nõmunmerrig wammørøsrkainabeløbe mōra marmeelø kuikkurri kebammuig køn.

⁷Incha treekkurri Moisés tsub uraskurri yandø yeeg yana purøguchen, Tiusbe katøle katøgan srøig “Møin Kwaløm” cha pasrig køn. Tiusbe Davidgurri øyeeg taig køn cha, tru mirawei na chab trendaim pala:

“Møin kwaløm ñim Tiuswei wamwan mōrabe,
mørøḡ kømui inchib ñimui manrrømeran
mur marmøtay” cha.

⁸Kaguende Josué tru israelitasmeran Canaan pirausrø pera kebya, Tiuswei tru isramigwan tranig købig kuig kuimbe, trube, Tiusbe Josué uñib uras mas wendøsrø tru isramig Tius tōga waig katøgan kwalømigwan waminchimubsruig kuinrrun. ⁹Inchawei treeg købene, tru kwalømmerna siete nemisren, Tius tru isrin kwaløm lataitøwei isramig nui misaameraimbe katøgucha truiibe ka pasran. ¹⁰Kaguende isramig Tius nø tøgagúinug mõitøgucha kebibiibe nui chi maramelan israb wamisran, Tius nui chi maramelan chab mara israb wamisrøb lataitøwei. ¹¹Inchawei treeg købene, isramig Tius nø tøgagúinug kebamrrab tranrrønrrab inchigun, inchippa mõikkøben tru mørmeelø marigwan asha, treegwandøwei marøb pønrrøwa, tru isramigu kebambamigwan kaimamønrrai.

¹²Pøs kaguende Tiuswei wambe øsiguig kømba, ka pasrømø, marøb pasrabig kømba, treeg køn. Kan espada pinrrøba katsig lataitøguen kømø, purø trøsrig

lataikke, namui mõiiba, namui espírituba pønrraisrøngatig kebibig kòn; namui asru kònabimørig, tsutsigu tutanumerasrønguen kelarrabgue. Incha chitø isua tøgagúilanba, katø manrrau chitø, chitø martrab isua tøgagúilanba tørgandø kelarrab kenamara pønrsøbig kòn. ¹³Chigurrimbunø kerrigu mara pønrsailø pønrrabiibe Tiuswei merrappe chigucha sørribe pønrrømøn. Treeg kømøtø, tru nam chigøben mariilan eshkað pønrramig Tiuswein kabyube chitøgucha kuragutsiilø tørguelarrø kena pønrran.

Jesucristo, tru Maya Sacerdotesmeran Nø Karub Sacerdote

¹⁴Pøs treeg købene, Jesús Tiuswei Nusrkai, tru Maya Sacerdotesmeran Nø Karub Sacerdote tru srømbalameranguen puraibig namuyasig purøwaminchibigwan nam tøgaguen pønrraig køppe, tru nam nuimburabigwan kørewa pønrrer taigu, truyutø tarømisrtrab kømø, meløgun. ¹⁵Pøs namui tru Maya Sacerdotesmeran Nø Karub Sacerdotebe nam kullaguelø kuigwan namun lastima ashibig kòn. Kaguende namun lataitøwei chiyugøben kebenørkønrrab indinab megaig købig kua. Inchendø nøbe managuen kaig marmuig kòn. ¹⁶Inchawei treeg købene, Tius nø ka yandø tab inchib wainug chi kørig isumøtø kemallgun, tru nø namun lastima asigwan nebua tøgagønrrappa, katø nam chigøben ke palaig meløben tru nui ka yandø tab indiitøga purugumdiig kui asiilø kønrrappa.

5 ¹Mø sacerdotetøgucha maya sacerdotesmeran nø karub sacerdote yu pirauigwane møguelai utugurri wesrawa pasrig kòn, Tiusweimburabeløyu misagweimburø nø marøb pasrønrrai, Tiuswan keta tranøb, katø misaamerai kaig mariilaimburø animal kweecha tranøb, treeg martrai. ²Inchen tru sacerdotetebe mayeelø lataitøwei chine nebuinabig kullaguig kuig køppe, chugúi mørmeelø pella amønibelan maig købash kømø, tab inchun. ³Incha nøgucha treetøwei kullaguig kuikkurri animal kweecha Tiuswan tranamig købig kòn, misaamerai kaig mariilaimburøtø kømøtø, tru kaig mariilø nuimburabigweiwan chigucha. ⁴Pøs øyeeg purø nuig tabig indig sacerdote kømigwane mugøben ka yandø nøasiitøbe tøgagønrraamøn, treeg kømøtø, tru Aarón latawei Tius wamitøwei trunune tøgagønrrun. ⁵Katø treetøwei Cristogucha tru Maya Sacerdotesmeran Nø Karub Sacerdote kønrrab nøasiitø purø nuig mismøtø, nøbe Tius øyeeg chibigweinukkuringuen utig kòn:

“Nibe nai Nusrkain køben,

møin kwaløm nabe ñui Møskai misrar” chibigwan.

⁶Katø katøganbaløsrøngucha Tiuswei wamwan pørigu nøbe Criston trendaig kòn:

“Nibeguende managatigwei sacerdote kòn cha,

Melquisedec maig køben, treetøweingue.”

⁷Cristobe yu pirau nø uñippatø Tiusba waminchib kappin kørøgøb, isuig trashib truba miabig kòn, Tius tru kwamigugurri wesramø kømø, wesrabigwan.

Inchen nune Tiusbe mörig kuig køn, maig taigwan nø køriibala mörøbig kuikkurri. ⁸Cristo ya Tiuswei Nusrkain købenguen, chine, chine nebuinab purayaigu maig karuigwan möramig købig kuin kui treegwan kusreig køn. ⁹Incha kerrigu newanig misrabe, tru mayeelø nun mörøbelaimbe managatigwei kaigyugurri wesraig kømigwane nøgurrin kønrrai, treeg misra pasramisrig køn. ¹⁰Inchen Tiusbe nune maya sacerdoesmeran nø karub sacerdote kønrrai wesrawa pasrig købig køn, tru Melquisedec maig køben treetøweingue.

**Subigwan Jesucristoinug pasra tøgagúigwan
elachib melønrrab kømø, isuptø tøgaguy**

¹¹Pøs øyeegweimburab wamindamibe truba truba nu tøgaguer. Inchendø ñimun ni kan mandø chaguen øyeeg køn tamgailø køn, pøs ñim chi taig möramigwane purø tsøndailø kuikkurri. ¹²Pøs ñim kusreb melaibe yeeg yanaguen køben, ashene, ñimbe manawei kusrenanøbeløguen kønrrapteelø købendø, katøgucha ñimbe Tiuswei wamwan srøsrø mandø pølbasra kusrenanigwan katøle mōikkøben trunundøwei srøig kusrenanamig palain køn. Ñimbe palain køppe, tranrrø mamig kømøtø, katøgucha pitsøbe palain køn. ¹³Inchen mōitøgucha pitsøtø muchibiibe katøgucha tru sølgandø tabig maram wamwane ni mandø kuinguen mörtrab kaimabig køn, katøgucha unøzhig lataig srø kua. ¹⁴Inchen tru tranrrø mamibe tru Tiusweimburabigu yandø ne nørrørawarwein køn, tru chi maramigwan yandø trendø mara ashibelø tru tabigwanba, kaigwanba maig kuigwan tab chigúí mörøbelai.

6 ¹Inchawei ke ne nørrøramnegatig ambubig amgun, tru Cristoimburabig ke srøsrø pølbasra kusrenanig købelane nøørø wemalsrøppa pønsra. Incha tru pølbasra kusrenaniilø: tru kaig marmønrrab isua möramigwanba, kwamigumay srua inrrabig kaig mariilan elachib amrruigwanba, isubigwan Tiusweinug pasra tøgagúigwanba, treeg kusrenanigutø katøle truigwandøwein kusreptø warø mugun, ²katø pitøga chishmarøb kōmeelan kusrenanigwanba, Tiuswei ureemeraim pala tasiimeran estsaramigwanba, kwabelø katøle øsiiramigwanba, kaig marimburø tru managatig maig kønrrabigwan kørrø maramigwanba, katøle truilandøweih, truilandøwei waminchib. ³Pøs Tius treeg kønrrain købene, trube, nørrøram maywan amrrab inchab.

⁴Kaguende yandø tru Tiuswei tørtrowa tørt mariilø, srømbalaserøngurri ketigwan tab kui mörøb utarmera, katø Espiritu Santoiwan utarmera, ⁵katø Tiuswei wamyu tabigwanba, tru wendøsrø attrabigu maramburab marøbelø truilanba nømbe purø tab kui mörøb inchibelø købendø, ⁶Criston kerriguwan wendøbasra katøle kørrøbene, nømune katøyuube nømui kaig mariilan isua mōra, Tiusweimay lliranrrai indamibe kaimamdiig køn, kaguende nōmdøwei Tiuswei Nusrkawan katøle kurusu mesrøb lataig maramba, misaamera nune kan chigucha kømiig kui lataig inchib ka

indzatø mørtraí maramba inchibelø kua. ⁷Kaguende sre puimørig tru píø sre piwan muchibiima tru kwallib melabelai tab kørnrai mamig tusrchig kørnrai tranene, Tiusbe tru píøzhigwane mayanguen tab inchun. ⁸Inchen kal tusrmerabah, ka kaig kaubatø misrøb píø tru ellmarig chi misrmíbe, ke kaig puindø mørtrabig køn. Incha yandø srabebe parrig kørnrun.

⁹Pøs nambe øyamay wamindindøgucha, nai undaarailø, ñimuimburappe mas tabig munig pasrain kui nambe asha pønrrer, tru kaigyugurri wesraig pønrrabigugurri arrubig. ¹⁰Pøs kaguende Tiusbe kalø marøptiig kømøtø, sølgandø tabig køppe, ñim chigøben marigwan pesannanrrab kømøwei, katø nui munchiwan ñim undaatøga kenamarigwan pesannanrrab kømøwein køn, Tiuswei misaameran ñim purugua, katøgucha purugubig purugub kuimba. ¹¹Ñim møitøgucha maig marøb melaigwan srabegatig treetø treetø kenamarøb melaimbemab isuer, tru ñim Cristoba tørguegwalmabigu purrønrrab isua munig melaigwan ke treeg kømnegatikke. ¹²Pøs nambe ñimun pøilø misrtrain kømøtø, tru nømui isubigwan Jesucristoinug pasra tøgagúitøgaba, tammay melabig melaitøgaba Tius tru tranrrab kørømisrigwan utab pønrrabelø lataitøwein kørnrai inder.

Tius tranrrab misrig chi isumgaig

¹³Kaguende Tius tru Abrahamwan ‘øyeeg martrab’ cha kørømisrøb urasma, katøgan mas nuigwei merrab ‘¡katø! marmø kømø, nabe maramønrrun’ cha, trendamdiig mu katøgan kaabene, pøs Tiusbe nøasiitøwei pasramisra, ¹⁴trendaig købig køn: “Isa kømø, cierton nabe ñun mayanguen tabig kørnrai marøb, katø ñuinukkurri maya nu misag larrøbichib kørnrai maramønrrun” cha. ¹⁵Inchen Abrahambe tammay muniirabig muniirab megawa, Tius tru tranrrab misrigwan utig købig køn.

¹⁶Pøs møgueløbe nøm lataguen kømø, mas nuigwei merrab pønrramisrabe, martraí indigwan ‘¡katø! marmø kømø, nabe maramønrrun’ chib pønrrabelø køn. Inchen tru nuigwei merrab nøm trenchib pønrraigwane nøm trenchib pønrraitøwei treeg marig kørømisrtraí marøbig køn, yandø mas wamindamikkaikke. ¹⁷Inchawei tru tranrrab kørømisrigwan ketig utønrrabelan Tiusbe nui isuigwane yunømartrab wamúig kuin kui ashchai tørgandø kenamartrappe, nøbe, ‘¡katø! marmø kømø, nabe maramønrrun’ cha kørømisriitøga treeg kørnrai mara pasrig køn. ¹⁸Inchawei iig tru pabaløwane chinchaguen yunømaramgaig, tru tranrrab kørømisriitøgaba, tru ‘¡katø! marmø kømø, nabe maramønrrun’ taitøgaba marig kua, Tiusbe chinha isønrraamøn. Treeg købene, nambe kullaaramø, mas mur pønrrønrrab inchigun, tru Cristoba tørguegwalmabigu purramigwan nam isua munig melamig namui merrab pasrabigwan ke tab tøga pønrramisra, Tius purømisrøb wainug nam kemendønrrab luløbeløbe. ¹⁹Iig tru tørguegwalmabiisrø purramigwan isub munig melaibe kan ancla piumbu ellgwawa barcon

merrarrab pasrabig lataitøwei namui møsiizhigwan yandø chi isumikkaig treeg pasrønrrai merrarrabigwan tøgaguer. Tru muniirab melaiibe, tru “Kerriguba Tiusweindiig Kønrrain” cha pasrinug tru tab llensuzhig kelarrab megai wendausrøngatig kebya pasran, ²⁰tru yandø managatigweyasig, tru Melquisedec maig køben treetøwei Jesúsbe Maya Sacerdotesmeran Nø Karub Sacerdote misra, tru namuyasig may kura trarrøb nømerrig kebyaisrø.

Melquisedec tru sacerdote

7 ¹Iig tru Melquisedecbe tru Salem ciudayu rey køb, Tius Mayeelaim Pala Pasrabigwei sacerdote kuig køn. Incha Abraham tru kwayabyu reymeran nø kanawa arruben, truiibe katønrrab webya, Abrahamwan ‘mayanguen tab kønrrun’ chibig køn. ²Inchen Abrahamgucha tru kwayabyu kanawa chitø srua arrigwan cienyu diez wesrawa, nun tranøbig køn. Tru Melquisedec munchibe: “Tabig sølgandø marøb rey køn” cha wamig køn. Katø nøbe Salem ciudayu rey kuig kua, tru Salem chippe: “Ambumay imay tab kønrrai marøbig køn” chibig kua, nøbe: “Chi isumgaig tab kønrrai maramigwan tøga rey køn” cha treeg munchigucha wamig købig køn. ³Melquisedecbe møskai usringawei, kølli misaamerai munchi pøra wariiløyu pørig kawei, nø kal-laigwan wamindig kawei, katø kwaigwan wamindig kawayig køn. Kan managatigwei sacerdote købig kønrrabig kua, nøbe Tiuswei Nusrkai maig køben, treeg lataitøwein køn.

⁴Pøs ñimguen isua asay, Melquisedecbe purø nuig køptø, tru namui merrabsrø kølli misag Abrahamguen tru kwayabyu kanawa chitø srua arrigwan cienyu diez wesrawa, nun tranig købig køn. ⁵Pøs tru maig maramigwan martrai Moisés pøriibe treeg kønrrain købig køn, tru Levíwei misagugurri amrrubelø sacerdotes kømigwan utabelaimbe tru cienyu diez wesraigwan israelitasmeran utamig, tru nømui nunelandøwei, truiløbe Abrahamwei misagugurrindøwei amrrubelø kuindøgucha. ⁶Inchendø Melquisedecbe Levíwei misagugurri arrumiikken, Abraham Tiusweyasig cienyu diez wesruigwan uta, Abraham Tius tru ‘øyeelø maramønrrun’ cha kørrømsriilan uta tøgawanguen tru Melquisedecbe ‘mayanguen tab kønrrun’ cha trendaig køn. ⁷Pøs kan muguen treeg kømøn tamgaig køn, tru ‘mayanguen tab kønrrun’ cha, trenchibiibe, tru ‘mayanguen tab kønrrun’ tainabig lata kømø, mas nuig kui. ⁸Tru Levíweinukkurri amrrub sacerdotesmeraimburappe, tru cienyu diez wesruigwan utabeløbe møguelø ka pinønrrabeløtø køben, trune tru utabig Melquisedecweimburappe, Tiuswei wamyube ka øsig wabig kui lataig, treeg waminchibig køn. ⁹Pøs, øyeekken isumdiig kørrø, tru Leví tru cienyu diez wesruilan nø utabig købenguen, tru cienyu diez wesruilan Melquisedecwan Abrahamgurri tru Leví mu kaabenbatøsrøwei traniibe, tru Leví nøguen trani lataig købig kuin kui tru Melquisedecwan. ¹⁰Pøs kaguende tru Melquisedec Abrahamwan katønrrab webarrub urasbe, Leví tru srøig kurrønrrabiibe nui kølli misag Abrahamwei asrugurri attrab srø købig køn.

¹¹Inchawei misaamera Tiusba newan tabelø kømigwan tru levitas sacerdotesmera Tiusweimburabigu marøb pønrraitøga nebua tøgagømig kønrrai marig kuig kuimbe, trube, chiwei sacerdote katøgan, tru Melquisedec maig køben, treeg tøgagømig srøig palømubsruinrrun, tru Aaróngurri amrrub sacerdotesmerayugurri arruaig kømíig. (Pøs tru israelitasmerayasig maig maramigwan martrai Moisés pøriibe tru levitasmera Tiusweiwan marøb pønrraigugurri arrubig købig kuindøgucha). ¹²Kaguende tru sacerdotesmera truyugurri amrrubelan yunømarene, trube, tru maig maramigwan martrai karuigwangucha srøig katøgan peemaytø yunømaramig køn. ¹³Pøs tru Tiuswei wamyu Cristo øyeelan wamindinabiibe tru Levíwei misag sötømerayugurrin kømøtø, katøgan misag sötøyuig køben, tru misagugurrimbe muguen trunune tru altaryube marøb pasrømuig køn. ¹⁴Kaguende trendø asig køn, namui Señor Jesucristobe Judáwei misag sötømerayugurrin kal-lawa arrig kui. Tru misaameraimburappe sacerdotesmera kønrrun cha Moisésbe treebe chigucha waminchimuiig køn.

¹⁵Inchen iibe mas tørgandø asamdiikken køn, tru sacerdote katøgan kenamisrøbig, Cristobe, tru Melquisedec lataitøwein kui. ¹⁶Truibe tru nø sacerdote kømigwan tøgagøppe, tru karua pøra pasrig, 'ø misaamerainukkurri arrubiibe sacerdote kønrrun' cha, trendaitøga kømøtø, tru maramburab marig øsig kømig mana pinønrrabig kømíitøga kuig køn. ¹⁷Kaguende nuimburappe Tiuswei wamyu øyeegwein chibig køn:

“Ñibe managatig sacerdote køn cha,
Melquisedec maig køben, treetøweingue.”

¹⁸Pøs tru maig maramigwan martrai pasrig merrabsriibe misaameran tabelø kønrrai chi martrabgawei, chi purugunrrabgaweyig køben, yandø menda mara pasrøppa, kagøbashiptindig køn, ¹⁹kaguende tru maig maramigwan martrai Moisés pøriibe chiwangucha newanig kønrrai marmuig kua. Inchendø mømimbe nam isua munig melamig katøgan mas tabig tøgagigwan Tius namun tranen, truikkurri nambe nun kemaler.

Jesúswan Maya Sacerdotemeran Nø Karub Sacerdote kønrrai wamig

²⁰Inchen iigwan treeg kønrrai marøppe, '¡katø! marmø kømø, nabe maramønrrun' cha, Tius trendaitøga marig køn. Inchen merrabsrø katøgan sacerdotesmerane '¡katø! marmø kømø, nabe maramønrrun' cha, trendaitøga kømøtø, mariilø købig køn. ²¹Trune Jesúswane sacerdote kønrrai neera wannøppe, '¡katø! marmø kømø, nabe maramønrrun' taitøga treeg mara wannig køn, tru øyeeg chib uras:

“Señor Tiusbe '¡katø! marmø kømø,
nabe maramønrrun' cha,
Tius nø treeg isuigwane yunømarig kønrraamøn cha:
'Ñibe managatigwei sacerdote køn' ” chib.

²²Incha øyeeg taikkurri, tru srøsrø acuerdo lataig kømøtø, mas purab tabig marigwan treeg kønrrai, Jesús nø purøbasramisrig køn. ²³Pøsrø tru merrab katøgan sacerdotemerabe nørrø nemisrøb ambubig køn, kaguende nømuimbe tru nøm marøb amrruigwan chu uraskatig marøbig marøb purrømøtø kwamig kuikkurri. ²⁴Trune Jesúsbe managatig øsig wabig kōppe, tru sacerdotemera marøb amrruigwan nøbe managatig marøbig marøb wamig tøgagøn. ²⁵Inchawei treekkurri katø nøgurri Tiusweimay kemallibelane nøbe managatigwei kaigyugurri wesrabig køn, kaguende nøbe nømuimburab purøwaminchib managatig øsig wabikkurri.

²⁶Kaguende Maya Sacerdotemeran Nø Karub Sacerdote nambe øyeegweim palai melaig kuig køn, newan tabig kui asig, chigucha kaig marig chigaig, newan chishchig, kaig marøbelainukkurri tarømarig, purø pala srømbalamerasrønguen puraya wanrrai kusruig. ²⁷Tru katøganølø maya sacerdotemeran nøm karub sacerdotemera pønrrabeløbe møitøgucha nømui kaig mariilaimburabigwanmerrig trana, trugurrimbe tru maya misagweyasig kaig marimburø kwalømmørig animalmera kweecha, Tiuswan tranøb pasramig, nøm lata Cristobe treeg maramig palain kømøn; kaguende nøbe nøasiitøwei tranøppe, kan pijitø managatigweyasig tranig køn. ²⁸Tru maig maramigwan martrai Moisés pøriibe tru maya sacerdotemeran nøm karub sacerdotemerane møguelø newan tabig kømeeelan neera purrønniilø køben, trune tru Moisés pørigwei wendau arrubig, Tius ‘¡katø! marmø kømø, nabe maramønrrun’ taig wambe, newan tabig kønrrai kørøromari Nusrkawan managatigweyasig neera wannig køn.

Jesús namuyasig tru Maya Sacerdotemeran Nø Karub Sacerdote

8 ¹Tru nam møi waminchib amrruppe, øyeeg chibre amrruer: Maya Sacerdotemeran Nø Karub Sacerdote nambe tøgaguer cha, tru srømbalasrø Tørbilabig Tius Purø Nuig wainug kusrmaygatø wamisrøbigwan, ²tru santuario, tru ciertonig mu møg kusrua pasrig carpa ya kømøtø, Tius nø kusrua pasrigu marøb pasrabigwan.

³Kaguende tru maya sacerdotemeran nø karub sacerdotebe møitøgucha Tiuswan ketiilø tranøb, animalmera kweecha tranøb indamig købig køben, tru sacerdote, Cristogucha chigøben tranamig købig køn. ⁴Nø yu pirau unimbe, sacerdoteguen kømubsrudinrrun. Kaguende Tiuswan ketamelan tru maig maramigwan Moisés pørigu maig tailan treeg marøb sacerdotemerabe købguen indan. ⁵Inchen tru sacerdotemera nøm marøb pønrrainuube tru srømbalasrø maig kuigwan øyeeg lataitøwein kuitamab asamibah, ka øyeeg kuitamab isumibatø køn. Moisés yandø tru Tiuswei carpa ya tabzhigwan pølsartrab inchib megabenma, Tiusbe trendaig køn: ¡Au! Tru tunbalasrø maig martrai eshkaigwan trunun asha maramig køn cha, kerriguba treezhigweingue. ⁶Inchen Jesúsbe sacerdotemera

marøb amrruig mas purø tabigwan nebuin køn. Kaguende tru purab nuig tranrrab misriilø purab nørreeløygurri wesrawa, pønsrai tru srø acuerdon Jesúsbe misaamerai nø pasramisra marøb pasran.

⁷Pøs tru srøsrø acuerdo Tius marig chi maramigwan newan martraptiig kuig kuimbe, truigwan kørrømara, katøgan srøig mara tøgagømig palømubsruinrrun. ⁸Inchendø Tiusbe nui misagu kalø mariilø køn tamig wetørrawa, trendaig købig køn:

“Señor Tiusbe trendan cha: Kwalømmera attrun cha,
Israelwei misaameraba, Judáwei misaameraba,
na nømbe katøgan srøig acuerdo maramig.

⁹Tru Egipto piraugurri nømun kwalyu kemøra wesrunrrab kwaløm,
tru na nømui møskaløba acuerdo marig lataig kømøtø
maramønrrun cha.

Kaguende truiløma na acuerdo marigu pønrrømuikkurri,
nabe nømunne isua ashmuptindig køn” cha,

Señorbe trendaig køn.

¹⁰“Pøs na Israelwei misaameraba acuerdo maramibe
iig køn cha, tru kwalømmerawangurrimbunøbe,
Señorbe trendan cha.

Na maig martrai karua pønsrailane
nømui isuiløyu na pønrsøb,
na nømui manrrømerayu pørøb inchen,
nagurri nømuimbe Tius køben,
nømgurrimbe naimbe nai misaamera kønrrun cha.

¹¹Mugucha chi kusrenanamig palømønrrun
nui mendaigwan lata,
nui nunewan lata: ‘Señorwan nebua ash’ chib,
kaguende mutøgucha nane nebua ashchun,
chigucha kømøzhikkurrimbunø mas nuikkatikke.

¹²Kaguende nabe nøm sølgandø tabig marøb amrrumuilan lastima
tøgagøb,
katø nømui kaig mariilan katøle isua wanrrab kømøwein kur” cha.

¹³Inchawei iig tru srø acuerdo, “srøizhig” cha wamappe, tru srøtø
marig købigwane, “køllig køn” cha trendan. Inchen yandø tru køllirab tru
patsab arrubiibe yandø ke pinamitø palab arrun.

Srømbalasrø santuariobe yu piraugig lataig kømøn

9 ¹Pøs trube, tru srøtø acuerdo mariibe Tiuswan køriibala tabig waminchib
mandø maramelan nørøø wesruigwanba, katø tru pirau Tiuswei carpa
ya tabzhigwanba waminchibig treeg tøgagig købig køn. ²Tru carpa yabe
øyeeg marig købig køn: tru umbu kebibyutø, tru “Tiusweindiig Kønrrain” tain
kwartuyube, kandileruba, mishatsiiba, Tiusweyasiitø tarømarim pirrimeraba

tøgaig. ³Inchen tru katøgan tab llensuzhig mesraig wendau trusrømbe, tru “Kerriguwan Tiusweindiig Kønrrain” tain kwartu wamig, truig pasrabig køn. ⁴Inchen tru umbube incienso parri altar orotøga mariiba, tru acuerdo mara kørømarin caja kerriguba orotøga pinøbulig truiba pønrrabig køn. Inchen tru cjayube tru kòtsø orotøga marigu tru mamig maná taigwan pusriiba, Aarónwei pørøtsig tru ishiizhig weguchibig købiiba, katø Tius tru acuerdo marigwan pørig tøgaig tru tambal sruuzheelø køben tøgaig treeg pasrabig køn. ⁵Inchen tru caja palabe querubinmera Tiuswei tru torguegwalmabig pasrai asamig treeg pønrrabelø køn, tru israelitasmera kaig mariilan Tius nø ulø payiimíig kønrrai marinug nòmui kwaldzariimeran trubalawan larrøbicha. Kerrigu øyeelane mømibe lutøgurrimbe wamindamgaig køn.

⁶Mira maig taig tru øyamay tamara pasrabe, sacerdotesmerabe Tiusweimburabelan maramigwan martrab katø katø kebambubelø køn, tru “Tiusweindiig Kønrrain” cha marin kwartuyu kebambubyutøbe. ⁷Trune tru umbusrø tru “Kerriguwan Tiusweindiig Kønrrain” cha marin kwartuyube pilayutø kebyamig køn, tru maya sacerdotesmeran nø karub sacerdote nøtø aningaig kømøtø, ani srua, trutøga nuyasiitøwei tranamiba, katø chugúi mormøwa misamera kaig mariilaimburø tranamibague. ⁸Incha Espiritu Santobe namune øyamay kuitamab isumig tør maran, tru santuario srøtiig ka pasrøbenbatøbe, tru “Kerriguwan Tiusweindiig Kønrrain” cha pasrinuumay misag umbusrø kebambam maybe kuriimíig srø køn cha. ⁹Iig øyeeg marig pasrabiibe tru mõi øyan kwalømwei øyan kønrrabig køn cha eshkanrrabig kuig køn, Tiuswan tru keta tranøb, katø animal kweecha Tiuswan tranøb, øyamay nun køriibala tabig waminchib marøbelane nòmui isub kebachib pasrabigwan newan chish martrab kaimabig kuin kui ashchai. ¹⁰Tru mamimeran, mutsamelan, pitøga peemay peemay chish maramelan tru øyeelø karua pønrrailøbe asru ka palaweindiig købig kua, srøig mandø maramigwan mara pasramnegatiitø kuig køn.

Cristo nø kwaitøga purab nuig marig

¹¹Inchen tru chinetø purø tabig pønrrabigwei Cristo, tru Maya Sacerdotesmeran Nø Karub Sacerdote arruppe, tru merrab carpa ya lata kømø, purø nuig, trurrigu newan tabigu kebyaig køn, mu taska marig, yu pirauig kømígu. ¹²Nøbe tru “Kerriguwan Tiusweindiig Kønrrain” cha marin kwartuyu kebpippe, kan pijitø managatigweyasig kebyaig køn, møg cabramerai aniwan srua kømøwei, toro-ureemerai aniwan srua kømøweingue. Treeg kømøtø, nui anindøgatøwei kebya, øyamay nuielø kønrrai misagwan managatig kaigyugurri wesrabig køn. ¹³Tru møg cabramerai aniwan kui, tru toro-ureemerai aniwan kui, ishug waara-unøzhigwan parri usrøwan kui, tru chish misramigweimburab Moisés maig martrai pørigwan trumay treeg chish misrmeelaim pala trunun wiitikken, tru nòmui asru pala chish kørømisrtraima treeg marøbig

kuibe ¹⁴treetøguen kòmøtø jtru Espíritu Santo managatig pasrabig, truikkurri Cristo Tiuswei merrab newan chishchig nõashib tranøbigwei animbe namui isub kebachib pasrabigu kaig mariilø kwamyumay sua ibig pønrrabigwan chishmarmønrraitarru, nam Øsig Wab Tiusweyasig marøb pønrramig kønrrai!

Møimbe øyeeg martrab cha wamindig srøig

¹⁵Inchawei øyeekkurri Jesucristobe tru srø acuerdo marigwan misagweimburø tru purøbasramisra marøbiibe nõ køn, tru keta tranrrab misrig managatigweyigwan tru wamiiløbe utønrrai, tru merrab srøsrø acuerdo marigu pønrrøwa, tru nõ kwaikkurri kaig mariiløyu melabelan nuielø kønrrai wesranrrab.

¹⁶Pøs møikkøben kan testamento marigweimburabma, truigwan marøbig kwan cha kilgamerayu yandø treeg eshkabendøwei truyu pøriibe maig taig treeg pub attrun. ¹⁷Inchawei yandø tru testamento mara kørrømariiibe trunun mara kørrømarøbig kwabendøwei tru pøriibe maig taig treeg pub attrun, tru kwamøwatø kòmøtø. ¹⁸Pøs tru srøsrø marig acuerdoguen anindøga treeg kønrrai mara kørrømarig køn, aningaig marig kønrrab kòmøtø. ¹⁹Inchawei Moisésma tru maig maramigwan martrai maig karua pønrrailan trumørig tru maya misaameran waminchib chab eshkawabe, toro-ureemerai aniwamba, møg cabramerai aniwamba, piba lindisha, trugurrimbe hisopo tusrchiiba, pigø isizhiibamara, tru lindisaitøga tru maig martrai pørig kilga welan kirrigwanba, katø nui maya misaameranba itøtsurøb, ²⁰trenchibig køn: “I anin køn cha, tru acuerdo marigwan yandø treeg marig kørrømisrtrai marøbiibe, ñim martrai Tius nõ karua pasrig.” ²¹Incha katø treetøwei tru carpa yawan lata, Tiusweimburab marøb pønrraigu nõm chigøben marøb lutøgurri sua pønrrailan lata, tru anindøga itø tsurøbig køn. ²²Kaguende tru maig maramigwan martrai Moisés pøriibe kerrigu lutauba anindøga chish marig kønrrain kua, chi ani lusha kømíibe tru kaig marigwan ulø paymø, ka kørrømarig kømibe kaagøn.

Cristo kwawa traniibe kaig marigwan kerrabig køn

²³Inchawei iilø, tru srømbalasarø pønrrabelø lataig asønabelanma animal kweecha trani anindøga chish maramig palaig kuibe, trune tru srømbalasarøngue trendø truyu pønrrabelane tru purab nuig tabig kweecha keta traniiløtøga chish mariilø kømig kuig køn, tru animal kweecha keta trani lataitøguen kømø. ²⁴Kaguende Cristobe tru santuario ciertonig maig køben møguelø ka tre lataig asønabig mara pasrinuutø kebimøtø, nõbe srømbalasarøngue kebyaig køn, mõi ya namuyasig Tiuswei merrab purøwaminchib wanrrab. ²⁵Tru maya sacerdotesmeran nõ karub sacerdote yu pirauibe pilayu kan pijitø tru “Kerriguwan Tiusweindiig Kønrrain” cha marin kwartuyu ani nuin kømíigwan tranrrab sua kebiben, trune

Cristobe katø katø nõasiitø tranrrab kømõtø kebyaig køn. ²⁶Incha Cristo tru sacerdotemera lataitøwei maramig kui kuimbe, tru pirøwan mara pasrinukkurimbunø katø katø kwamig nebubsruig kuinrrun. Incha mõi ya kerriguwan srabe kwalømmerawan nõbe kan pijitø managatigwei kenamisin køn, tru nõashib kwaitøga kaig mariilan patsøga partrab. ²⁷Misaamerane kan pijitø kwamig kønrrai mara pasrig køn. Inchen tru wendaube yandø maig kønrrabigwan asha kørømarig kømig, truig attrun. ²⁸Katø treetøwei Cristogucha kwappe, nõ purøbasramisra kan pijitø kweetsig kwaig køn, truba nu misagwei kaig mariilan nõ kerranrrab. Incha katøle arruppe, chigøben kaig mariilan nõ niirrab kømõtø, nõ arrumigwan truba truba munig melabelane kaigyugurri wesranrrab attrab køn.

Maig maramigwan martrai Moisés pøriibe newan marmuig

10 ¹Tru maig maramigwan martrai Moisés pøriibe tru wendøsrø ciertonig attrabigwan øyeeg kuitamab asamig ka tre lataig asønabiitø kuig køn, ke truiløbe kømuintøgucha. Incha øyeekkurri chu urastøgucha katø pilamørig, pilamørig animal kweecha traniilø trutø trutø marøb melaitøgabe newan tabelø kønrraimbe managuen treeg martrab kaimabig køn, tru Tiuswan tabig waminchib øyamay mariiløtøga kemallibelane. ²Inchawei øyeeg mariitøga tru newan tabelø kønrrai marøbig kui kuimbe, tru kweecha tranamelan øyangatiitø tranøbsruig kuinrrun. Pøs tru øyamay Tiuswan køriibala tabig waminchibelø tru nõmui kaig mariilan kan pijitø kerriguweyasig chish mariilø kui kuimbe, trube, tru kaig marigwan tøga pønrrermab isub pønrramig chigagøbsruig kuinrrun. ³Inchendø tru animalmera kweecha pilayu pilayu tranøb kuiløbe kaig marigwan katøgucha tøgar kermab isungarubig køn. ⁴Kaguende toro-uremerai animba, møg cabramerai animbabe tru kaig mariilan chi kerranrrab kaimabig køn.

Cristo nõ kwaitøga kanmaytø newanig marig

⁵Inchawei Cristo yu pirau arruabe, Tiuswan trenchibig køn:

“Nibe ketig traniilan lata, kweecha traniilan lata
utag kømui indig køn cha.

Inchendø kan asr tøgagønrrai,
ñibe nayasig tamarig køn cha.

⁶Parra keta traniilanba,
kaig mariilaimburø traniilanba
chigucha chi tabig asønamuig køn cha.

⁷Inchen nabe ñun trendaig køn cha:
‘Nabe yu pasrar cha, nai Tius,
ñi maig maramig palai waben, na trunun martrab,
tru libroyu naimburab maig pørig pasrøben, treeg.’ ”

⁸Tru srøtø yu wendau chibgunrrig: “Nibe kweecha traniilan lata, ketig traniilan lata, parra keta traniilan lata, kaig mariilaimburø traniilan lata

utag kòmui inçhib, ñune chigucha chi tabig asønamuig køn” cha, (tru øyeelan traniiløbe tru maig maramigwan martrai Moisés pørig maig køben treeg traniilø kuingucha). ⁹Inçhabe katø trendaig køn: “Nabe yu pasrar cha, ñi maig maramig palai waben, na trunun martrab”. Tru animal kweecha tranøb kuig merrabsriigwane Tiusbe tarømara pasrig køn, Cristo kwaitøga tru wendau srøig arrubigwan mara pasrtrab. ¹⁰Tius tru maig kønrrain køben treegu nambe nuindø kønrrai tarømariilø ker, Jesucristo nui asrwan keta trana, treeg marikkurri, tru kan pijitø managatigweyasig kwaitøga.

¹¹Chi sacerdotetøgucha kwalømmørig, kwalømmørig Tiusweimburabelan marøb pasrappe, kweecha traniilø katø, katø, treetøweih, treetøwein tranøbig køn, tru kaig mariilan managuen kerranrrabgailan. ¹²Trune Jesucristobe kaig mariilaimburø nø kwawa, kan pijitø managatigweyasig nui asrwan trana, Tiuswei kusrmaygatømay wamisrig køn. ¹³Inçha trugurrimbunøbe nui ashig kòmui inçhibelan nui srøbmeran truilaime pala nebuna wamig kønrrai Tius treeg maramnegatig, truigwan muniirab wan. ¹⁴Kaguende Cristobe kan pijitø keta traniitøgatø managatigwei newan tabelø marig køn tru Tiusweindø kønrrai tarømarilane. ¹⁵Katø Espíritu Santogucha ‘treeg køn’ cha namun truigweimburab eshkawabe, øyeemerrig chibig køn:

¹⁶Señorbe trendan cha:

“Tru na nømbe acuerdo maramibe iig køn cha:

Tru kwalømmerrawangurrimbe na maig martrai karua pønrrailane
nømui manrrømerayu pønrrøb,
nømui isuiløyu trunun na pørøb indamønrrun” cha.

¹⁷Inçha katøgucha trenchibig køn:

“Nømui kaig mariilanba, larrø trømbøig mariilanba
nabe managuen katøle isub wanrrab kømur” cha.

¹⁸Inçhawei iilan yandø chi ulø payamig kømfiig kørømarene, tru ka i mariilaimburøbe keta tranamig yandø chi palømøn.

Tiusweimay kemallgun

¹⁹Inçhawei, nai nunelø, santuario marinug srømbalasrø Señor Jesúswei aningurri chigucha chi kørig isumø kebambamig tøgaguer, ²⁰srø may tru managatig øsig køm maywan, tru tab llensuzhig kelarrab mesraiwan nø namuyasig kura trarrøb kebyaiwan. Tru tab llensuzhiibe nui asr køn. ²¹Inçhawei kan sacerdote purø nuig Tiuswei misaameran kerriguwan nø ashib pasrabig nam tøgar kuig køppe, ²²nambe namui manrraube chi sora kømø kandø isub Tiuswan kemallgun, isubigwan Cristoinug pasrigwan chi kørømø tøga, kaig isub kebachib pasrabig tøga manrrømeran chishmartrab anindøga itøtsura, chish pizhiitøga namui asrwan chish marague. ²³Tru nam munig melaigwan treeg kørewa tøgagúigwane tab tøga pønrrøgun, ambumay imay srua ambinab kømøtø, kaguende tranamigwan Tius tranrrab misra kørørmisrøbiibe maig taigwan tranmø kømø, tranøbig køn. ²⁴Inçhawei

kanikkurri kanikkurri puruguyamigwan isua asiyagun, undag købigwan tøgagømig kønrrai martrappa, chigøben tabig maramig kønrrai martrappa. ²⁵Nambe kanbalatø linchib Tiusweiwan marøb tulundzunamigwane elachimugun, tru møiløgøben amrrug kømub elachib kebambubelø latawei. Treeg inchimøtø, kangurriin kangurri øyamay meløgun chib puruguyagun tru Cristo Arrum kwaløm yandø pub arri ashabe, masken traatø melab.

²⁶Pøs Cristoimburburab tru newan ciertonig maig kuigwan nam nebua asigwan utappe, utøbendø, kaigwan ke ka marøg køppa marøb uñene, tru kaig mariilaimburø chiwan kweecha Tiuswan keta tranøptamibe yandø chigagøn. ²⁷Treeg kømøtø, tru kørig kømdiig maig kønrrabigwan Tius asha marinab pønrramiba, katø tru Tiuswan ashig kømui inchibeløbe nag purø trømbøig naarabiitøga pinisailø kømiba, treegwandø muniirab pønrran. ²⁸Tru maig maramigwan martrai Moisés karua pasrigwan mørmø, kaashibigwanma pailø kui, pønelø kui ‘kalø maran’ chibelø werrubene, chigucha lastima asiimíig truike kwamig købig køn. ²⁹Inchawei Tiuswei Nusrkawan chi kømíig kui lataig itøbunab, katø tru acuerdo marigwan Tiusweindø kønrrai nømun tarømarøb aniwana larrø trømbøig kui lataig mara tøgagøb, tru ka yandø tab inchib Espíritun tsalø wamamba inchibigwane kan treetøguen kømø, purø trømbøig møra meganrrai marøbwei inchimønrraitarru. ³⁰Kaguende nambe øyeeg chib Tiuswan ashibelø ker: “Kaig marøbigwan møra meganrrai maramigwane na maramig køben, truburø pagarwane na pagaramønrrun” chibigwan. Katø treekkucha taig køn: “Nui misagwan maig maramigwan asha kørrømarøppe, Señor nø asha kørrømartrun” cha. ³¹Øsig wab Tiuswei tasku kebenamibe si, ¡purø trømbøig kørig kømdiig køn!

³²Ñimnguen tru merrab kwalømmerasriigwan katøle isumbala, Cristoi tru srø wam tabig ñimun kebiløbengurribunø, kwayamigu lataitøwei purø trømbøig nebuinab, isui pønrramig arruben, tru uras ñimbe ka melaig købigwan. ³³Ñimune kanmaymerawane maya misaamerai merrab indza asamig chine marinab, kaig indinab, katøganelan katø øyeetøwei marøb srua køben, ñimgucha treegutøwei tøga puraambub lincha pønrrabelø køn. ³⁴Katø kailan keeri yau pønrrabelø lastima isuim pønrrøbene, ñimbe ñimun kui lataitøwei isub, ñimui chi tøgagúilan kerrailø melamig nebuingucha, treegu kasraatø ka melab inchibelø køn, kaguende mas purø tabig mana patsønrrabig kømíigwan tøgar kermab isua ñimbe asha melabelø kuikkurri. ³⁵Inchawei ñim ke Tiusweinuutø kemenda pønrraigwane elachippa amrrab kømø, kaguende truike purø nuig tabig utamig kønrrabigwan tøgag køn. ³⁶Pøs ñimbe chi isumø tammay melabig melay, Tius maig maramig palai waben trunun ñim chab marikkurrimbe, nø tranrrab misra kørrømisrigwan utamig kønrrai. ³⁷Kaguende Tiuswei wamwan pørigube trenchibig køn, pøs kan maya yanazhigutø,

“tru attrabiibe attrun cha. Chi srarrønrraamøn cha.

³⁸Inchendø tru sølgandø tabig naimbe
nui isubigwan nainuutø pasra tøgagúikkurri øsig uñchun cha.

Inchen nõ koriimata wendømay yabe,

trube, nõbe nane tab kui wanrrai martraamøn” cha.

³⁹Inchendø nambe tru pinisailø kønrrab koriimata tru wendømay ambupteeløgucha kømøtø, isubigwan Cristoinuutø pasra tøgarmera kaigygurri wesrailø, truilø ker.

**Merrab misaamera nõmui isubigwan Tiusweinuutø
pasra tøgagúig**

11 ¹Pøs isubigwan Tiusweinug pasra tøgagúibe tru munig melaigwan ke treeg kønrraitamab isua pønrramig køb, katø nam chi asiimíigwan chabguen ke asha lataig pønrraig, treeg køn.

²Pøs isubigwan Tiusweinug pasra tøgagúikkurri namui merrabsrø misaamerabe Tius nõmun tabig wamandinabelø køn.

³Pøs isubigwan Tiusweinug pasra tøgagúikkurri kerrigu chi købigwane Tius nui wamdøga mara pasrig købig kuin kui wetøgørra pønrrer. Inchawei kaptøga asiibe chi asiimíigugurri mara pasrig køn.

⁴Isubigwan Tiusweinug pasra tøgagúikkurri Abelbe animal kweecha Tiuswan purø tabig tranig køn, Caín trani lataitøguen kømø. Abel nui isubigwan Tiusweinug pasra tøgagúikkurri nõbe sølgandø marøb møg køn cha Tius wamandinabig køn, tru nõ keta tranigwan Tius kashmø utab uras. Isubigwan Tiusweinug pasra tøgagúikkurri Abelbe kwaig mu kaabendø, katøgucha nõbe wamindan.

⁵Isubigwan Tiusweinug pasra tøgagúikkurri Enocwane yu piraugurri Tius srua iben, nõbe tru kwab tamigwane maig købig kui mørmuig køn. Incha nune wetørranrrab kaimaig købig køn, kaguende Tius srua yaig kua. Pøs nun srua yaig kømøwatø, nõbe wamandinabig køn, Tiuswan tab kui wanrrai marøb møg køn cha. ⁶Inchawei isubigwan Tiusweinug pasra tøgagømøwabe, Tiuswane ni chinchaguen tab kui mørtraí maramgaig køn. Kaguende Tiusweimay mõikkøben kemallibiibe, Tiusbe øsig wabig kuin kui køreb, katø nun labelane nõbe tranamigwan tranøb inçhibig kuin kui køreb indamig køn.

⁷Isubigwan Tiusweinug pasra tøgagúikkurri Noéma chi asiimíig attrabigwan isua kønrrai Tius eshkabenma, nun truba køriitøga arcan marøbig køn, nui yaelø kwamø, øsig webamrrai. Noébe tru øyeeg mariitøga pirau maya misagwan kailøgurri Tius møra pønrrønrrai mariilø købash cha kørrømara, chi kaig kømíig lataig Tius tabig kørrømarig kømigwan nõbe utig køn, tru isubigwan nuinug pasra tøgagúigugurri arrubigwan.

⁸Abrahamma isubigwan Tiusweinug pasra tøgagúikkurri tru ketigwan wendø utamsrømay webya inrrai wamøben, nõbe møra, webya yaig købig køn, chumay yam kuinguen mørmubendø. ⁹Nøbe isubigwan Tiusweinug pasra tøgagúikkurri nuin kønrrai tru tranrrab misrim pirau Abrahambe ka peesrøngurri arruatø lataig, kan peg pirau lataitø tsuig købig køn,

nun keta tranigwandøwei utabelø tru Isaacba, Jacobpa, truilø lataitøwei kan carpa yamerayu. ¹⁰Kaguende Abrahambe tru ciuda katsigwan niga pasrønrrabig tōgaig tru srōmbalasriigwan muniirabig kōbig kua. Inchen tru ciuda maig kōnrrabigwan treegwei unaasha wesrab, truigwan marøb inchibiibe, Tius nō kōn.

¹¹Abrahambe nōbe yandø maya kōllig kuatōgucha isubigwan Tiusweinug pasra tōgagúikkurri unōtiig latawei chish kōmigwan utig kōbig kōn unō mōskain kōnrrab, (Sarabe ureg tōgagōnrrab kaimabig kuindōgucha), kaguende tru tranrrab misrōbig Tiusbe tru tranrrab misrigwane tranmō kōmō, tranrrab kui, Abrahambe treeg isua tōga pasraig kua. ¹²Inchawei tru unō tōgagōmigweimburappe yandø kwaig lataig kuig, tru kan mōweinukkurrindø uremera srōig larrōbichib mendappe, nu kōptō srōmbalasrō estrellamera lataig, pi menda pisrum lataig kōbig kōn, mu nebua mundzamgaig.

¹³Inchen i misaamerabe mayeelōba isubigwan Tiusweinug pasra tōgagúigutō amōnaig kōn nōmui kwam kwalōmgatig. Tius tru nōmun tranrrab misra kōrrōmisriilane utōmuindōgucha, Tius tranrrab misrig nuisrō pōnrrabelan yabrōngurrindø ke kan asha lataig kasraarabelø kōn, ‘nambe srōmbalasreelø, peesreelø kua, yu piraube ka petōweindø warer’ chib, tōrgandø trenchib waminchib. ¹⁴Inchen øyamay waminchibelōbe tru katōgan pirō nōmuin kōnrrabigwan lab ambubelø kui, nōmbe tōrgandø asamig kenamaran. ¹⁵Pōs tru nōm werrua amrruin pirōwan isub pōnrraig kui kuimbe, katōle trusrōmaytōwei llirawa ambimbe, ka ambamdiig kōbsruinrrun. ¹⁶Inchendø nōmbe treeg marmōtō, waramig katōgan pirō mas purō tabigwan tōgagōnrrab isub pōnrraig kōn, truiibe tru srōmbalasriigwan. Treekkurri Tiusbe chi kōrig kuin kōmōn ‘nōmui Tius kōn’ taig kōmig, pōs nōbe nōmuyasig kan ciuda tamarig kua.

¹⁷Abrahambe isubigwan Tiusweinug pasra tōgagúikkurri Tius Abrahamwan maig inchibig kōtashchab marenma, nōbe Isaacwan tranig kōn. Tius tru ‘tranrrumōn’ cha kōrrōmisriilan utabig, tru Abrahambe, nui kandø nusrkai Isaacwan Tiuswan yandø ke kweecha tranamitō palabig kōn ¹⁸Abrahamwane: “Tru ñuinukkurri amrrub misaamerane Isaackurrin kōnrrabelø kōn” cha, Tiusbe øyeeg taig kōbig kuindōgucha. ¹⁹Kaguende Abrahambe isua pasrabig kōn, Tiusbe kwailai utugurringuen katōle kusrumig maramburab marōbig kui. Pōs kwailai utugurri katōle øsiiraig lataig kui mara Isaacwane treeg utig kōn.

²⁰Isaacbe isubigwan Tiusweinug pasra tōgagúikkurri Jacobwanba, Esaúwanba nōmune mayanguen tabig pub attrai marig kōn tru wendōsrō attrabigwan.

²¹Jacobma isubigwan Tiusweinug pasra tōgagúikkurri yandø kwanrrab wawa, Joséwei uregwan kanun kanun mayanguen tabig nebunrrai mara, nui pōtōnain tsigwan pōtōnawa pasramisra, Tiuswan kōriibala tabig waminchibig kōn.

²²Joséma isubigwan Tiusweinug pasra tōgagúikkurri yandø kwamig lutaurab arruben, israelitasmera mayeelōba Egiptogurri wendōsrō

webambamigwan wamincha, nui tsutsiimeran mandø indamigwan eshkab karua pasrig køn.

²³Isubigwan Tiusweinug pasra tøgagúikkurri Moiséswei møskaløma Moiséswane larrø tab unøzhig kui asha, pøn pøl ørøba nun søra tøgagúig køn, tru Faraón Egipto pirau rey tru kwetchai karua pasrigwan chi køriimatømøtø.

²⁴Moisésma isubigwan Tiusweinug pasra tøgagúikkurri yandø kølig misrabe, tru Faraónwei nimbasrwei nusrkain køn cha wamig kømigwan kaasig køn. ²⁵Moisésbe Tiuswei misaameraba larrø kaig indinab megamigwan isuig køn, tru kaig mariiløyu tab kui mørøb kan maya yanagatiitø kasraarabgunrriibe. ²⁶Wendøsrø attrabig Cristoyasig chine trømbøig waminab megaibe, egipciosmera chigurrimbunø tøgagúilan kerrigu tøgagúí lataikken kømø, purø nuig kui isua pasrabig køn, kaguende nøbe tru wendøsrø truburø ketig utamigwan, trunun ashib pasrabig kua.

²⁷Isubigwan Tiusweinug pasra tøgagúikkurri Moisésbe Egipto piraugurri webyaig køn, rey maya namikkølig waingucha. Inchen trunun kørmøtø, nøbe webya inrrab kandø isua pasraig køn, kaguende tru kaptøgabe nebua asiimø Tiuswan yandø ke asha lataikken pasraig køppe. ²⁸Isubigwan Tiusweinug pasra tøgagúikkurri tru Pascua Fiesta taigwan mara, katø tru yaskappalamerawan aniwana srølig køn, tru kwangarub ángel israelitasmerai mayor nusrkalane kweechimønrrai.

²⁹Isubigwan Tiusweinug pasra tøgagúikkurri israelitasmerabe Mar Rojoyu kan trendø puryu lataig larraambig køn. Inchen egipciosmeragucha larramrrab inchen, pi katøle itøgasrøben, chab kwaig køn.

³⁰Israelitasmera isubigwan Tiusweinug pasra tøgagúikkurri tru Jericó ciuda pøtøgatan sruubirøbanrrimerabe chab kegørrig køn, nøm tru pøtøgatanwan kwalømmera siete nemisramne lliraben. ³¹Isubigwan Tiusweinug pasra tøgagúikkurri tru Rahab, nui asrwan anwei yanøb ishuuma, tru mørmø misaameraba kanbalatø nøgucha kwamuig køn, kaguende tru pailø israelitasmera maisrøn køtashchab nilø ashchab amrrubelan tab wamab utikkurri.

³²¿Masbe chiwan waminchab køh? Pøs nane Gedeónweimburab køben, Baracweimburab køben, Sansónweimburab køben, Jeptéweimburab køben, Davidweimburab køben, Samuelweimburab køben, katø Tius maig karuigwan eshkabelaimburab køben wamindamikken nebumøtan. ³³Isubigwan Tiusweinug pasra tøgagúikkurri katøganelø nøm ashib karub tøgagúigwan nøm kanab, tabig sølgandø maig maramigwan marøb, Tius tranrrab misra kørrømisriilan nebua utab, leónmerai triimeran kasrøb indig køn. ³⁴Nag kørig kømdiig naarabelan naaramønrrai kweechib, espadatøga kweetsiilø kømigugurri wegørra ambub, truburab chi martrab kaimabelø købig kuig chisheelø misrøb, katø kwayabyugucha kwayamburab kwayabelø misra, peg pirausrøngurri amrrub suldaumerane luløsrkøb inchibelø køn. ³⁵Isubigwan

Tiusweinug pasra tögagúikkurri ishumburmera nòmui kwabelan katøle øsiiraniilø utabelø kuig køn. Inchen møiløbe kwamnegatig purø trømbøig marøb srua kuinabelø køn, elatchab indingucha, elatchamamøtø, kaguende nømbe katøle øsiirawa srømbalasrø purø tabigwan nebunrrab isubelø kua. ³⁶Inchen katøganeløbe kaig marøb indza ashib srua kuinab, ichabetinab, cadenastøga lusrinab, kailan keeri yau merrarawa keerinab melabelø køn. ³⁷Inchen kaneløbe sruutøga peta kweetsinab, serruchotøga sølbinab para kweetsinab, espatatøga kweetsinab, amburab iburab ubisha kaluschibah cabra kaluschibatø kewar amøñibelø køn, larrø waachamera kømig nebuilø, isubiitø kappinbalatø amønamiig nebuilø, katø larrø kaig indinab melamiig nebuilø. ³⁸Øyeeg tab misaameran yu pirau misaamera nømun tögagømiibe nømbe purø nu palabelø købig køn. Nømbe mu misag warab waraimøsrø, nørrø tunmerawansrø chu pumgúinguen mørmeelø amøñibelø køn, nørrø srug yaambumerasrø, lendegørrab pirørrabmerasrø, øyeesrø kebamba warab.

³⁹Inchen nømbe isubigwan Tiusweinuutø pasra tögagúigube tabig wamindiilø købendø, tru Tius tranrrab misra kørrømisriilane møikkucha tranig utømuig køn. ⁴⁰Kaguende Tiusbe nømui lata kømø, namuyasiibe purø tabig tögagúig kua, tru nømbe namba kanbalatø misratøwei tru newan tabig kønrrai indig kuig køn.

**Maramga murelø amrruben, chi isumø,
namgucha mur pønrramiig**

12 ¹Inchawei øyeeg købene, tru isubigwan Tiusweinug pasra tögargøbelø nørrø køptø kan wañi lataig namuim pøtøgatan namun ashib purrabelan namgucha tögagúig køppe, namun chiguen tab ambamgaig chigøben kwatsiiranøbelanba, tru kaig marøbig namun iløsrkøptø iløsrkønrrai marøb pasrabigwanba webetøgun. Incha tru nam luløb ambamiig Tius namui merrab may trarrig tsubig nam tøga pønrraiwan maikkucha kørrømisrmø, luløbig lulgun, ²namui kaptøgabe Jesúswan ashib, tru nømerrig treegwan pera marøb, katø tru namui isubigwan nuinug pasra tögagúigwan newanig kønrrai marøb inçhibigwan. Pøs Jesúsbe nø pumsrø kasrag kømdiig pasrabigwan asha pasraikkurri kurusyu mesraig kweetsig kwamigwan awentawa, tru kørig marinab pasramigwan chi trunun isua ashmøtø, truyu puraya, Tius wamisra wainug kusrmaygatømay wamisrig køn.

³Incha tru kaig marøb misaamera Jesúswan chine kaig maren, treegu ka awentab purayaigwan, trunun ñimguen isuy, ñim chi muraaramøwei, chi kaima kørrømisrmøwei indamiig kønrrai. ⁴Pøs tru kaig mariiba ñim kwayab melaigu, ñimbe katøgucha ñimui aniwan lusamnegatiibe mara pønrrømøn. ⁵¿Tius nui ureg kuimba tab wamdøga waminçhib purugúigwan ñimbe yandø pesannabguen inda chindah?

“Nai nusrkai, ñi mur pasram kusrenrrai Señor ñun murelan kusrennene, kagatørre inditamab treeg isua tögagømwøwei,

Señor ñun isua mörtraí marene,
truyutø korrømisrmøwei indamig køn.

6 Kaguende tru nui undaaraigwane

Señorbe nune mur pasram kusrenrrai kusrennøb,
mundøgucha nui nusrkain kuitamab isua tøgagúigwane
nøbe kalø marigwan ølmartrab murba tranøbig køn” cha,
trenchibig køn.

7 Maramga murig latailø Señor ñun maringaruigwane mur pasram kusrenrrai kusrenrrab inditamab isua awentau. Kaguende Tiusbe ñimune nui nusrkain kuimba øyeeg maran. ¿Kan nusrkawan møskai mur pasram kusrenrrai kusrenniimig mu treeg nusrkai kø chinderah? 8 Inchen tru kanelø mayeelø mur pønrram kusrenrrai kusrenniilø latawei ñimun kusrenniimeelø kuisruandøbe, trube, Tiuswei trag nusrkalø kømøtø, ka menda ureemera kuin kønrrun.

9 Inchagucha namma yu pirau namui møskalø namun mur pasram kusrenrrai kusrennøbelø nambe tøggar kua, truilanma maig købash inchimøtø, tab inchib tøgagøbelø kuibe, ¿tru namui espírituimerai Møskai Tiuswane treetøguen kømø, masken maig taigwan tru kuindø mørøb meløwa, øsig kømigwan tøgagømig kømønrraitarru? 10 Namui møskaløma nam mur pønrram kusrenrrai nømbe kan maya yanagatiitø namun kusrenanøb tøgagøbelø købig køn, nømun maig maramdiig køben, treeg. Trune Tiusbe nam mur pønrram kusrenrrai kusrennøppe namunguen tab kønrrai maran, nø newan tabig kuigwan namgucha tøgagønrrai. 11 Tru mur pønrram kusrenrrai murigwan kusrenanene, ke kan tru urastøbe chiguen chi kasrag kømdiig kømøtø, mur kui mørøb pasramibe købig køn. Inchendø tru øyawan kusrenaninab puraambubelaimbe tsøndatøbe sølgandø tabig amønamiba, chi isumgaig tab amønamiba tøggaig arrubig køn.

Tius wamindigwan kaasamibe kørig kømdiig køn

12 Inchawei ñimui kwalmera kullaarailan chishmisrtraí kønøgøb, ñimui tømmera itønapteelan katøle mur misrtraí maray. 13 Katø ñim tab punab ambamig kønrrai putur maymeran ølmaray, tru ñimui kørriindi srøb wetunshimø, tammisrtraí. 14 Ñimbe maya misaameraba ambugurri igurri lata tab kømigwanba, katø Tiusweyasiitø tarømisra tabig amønamigwanba martrab inchib kuy. Kaguende Tiusweyasiitø tarømisra tabig amønimøwabe, muguen Señorwane ashchaamøn. 15 Ñimbe purø tab isua ashib amønay Tiuswei tru ka yandø tab indigwan ñim møikkøben wendøbasrøb pønrrabgunmab, inchippa ñim møigwan køben kan møb srølgølig lataig kal-lawa nurab ya, truig pesriig iløsrkønrrai maren, misag purø nuwan tru kaitøga mindisailø kømønrrai. 16 Mugucha møg lata ishug lata trømbøig marøb uñchab kømøwei, kabe Tiusweimburabigwane chigucha kømui lataig inchibig kømøwein kuy, tru Esaú latawei. Truima kan mamig nindagweindø kan mayor nusrkai maig tøgagømigwan yanig køn. 17 Kaguende ñimbe yandø asiinrrun, Esaúbe mas wendøbe tru

mayanguen tab indig k nrrai keta tranigwan kat le m skawan ut nrrab inchen, nune yand  ka taig k bigwan. Tru mayanguen tab indig k nrrai tranigwan t gag nrrab kappin k rr g b lawa, yand  treeg k nrrai chab marigwane ni chinchaguen lliskamgaig kuig k n.

¹⁸P s  nimbe, israelitasmera Sina  Tunyu kemalla p nrrab latawei, kan nu tun kat ramdiigu nagur mera naarabig t gaigu kemalla k m wei, kabe l stiig, tru pur  tr mb  l stiigu kemalla k m wei, kabe k rig k mdiig isig ichibigu kemalla k m wein k n. ¹⁹Kat   nimbe tru trompeta mur wanrr bigu kemalla k m wei, kan wam wamindiilan m rtrab kemallm wei indig k n. Inchen tru wam wamindiilan m r bel ma: “Tiusmanda yand  waminncha” chibel  k n, ²⁰kaguende yand  mas awentawa p nrramgaig k ben, Tius tru  yeege karua pasren: “Kan animald guen tru tunwan kebachibiibe sruut ga peta kweetsig k nrrabig k n cha” trenchiben.

²¹Inchen tru treeg pureb pasrabiibe pur  tr mb big k rig k mdiig k ben, Mois sbe trenchibig k n: “Kwaar sraig k rig k biit  ke it nab pasar” cha.

²² nimbe treegu kemalla p nrr m t , m imbe  nimuiburappe tru Sion Tun tainug,  sig wab Tiuswei ciudadr , sr mbala Jerusal nsr , muguen mundzamgaig  ngelesmera tulundzuna kasrag purraisr , treegu kemalla p nrran. ²³Kat  Tiuswei tru sr sr  kal-lawa ureemera n mui munchimeran sr mbalaser  p rig t garmera kanbalat  purraisr , kat  Tius tru maya misagwan maig maramigwan asha mar big waisr   nimbe kemalla p nrrab, kat  mayeel  s lgand  tabig misaamerai esp ritumera yand  newan tabel  k nrrai k rr mariil  purraisr  kemalla p nrran.

²⁴Kat  tru sr  acuerdo marigwan misagweimburo pur basramisr big Jes swangucha kemalla p nrrab, kat  tru Abelwei ani ‘tru kaig mar bigwan  ni, Tius, ul  pay’ chib, ani lataikken k m t , Jes swei tru ani it surig mas pur  tabig ‘tru kaig mar bigwan ul  paym ,  ni, Tius, pesannau’ chib waminchib aniyu kemalla p nrran  nimbe.

²⁵Inchawei tru waminchibigwan kaashib k nrrab k m  ashipt  kuy. Kaguende Tius Mois skurri isupt  k nrrai wamindigwan kaashibel ma yu pirauguen chi indiim ig ka yand  weg rr muibe, trube, tru sr mbalaser ngurri isupt  k nrrai waminchibigwan tar misrabe, nambe truyugurrimbe ni chinchaguen weg rramgaig k nrrun. ²⁶Tru Mois s tsub urassr ma Tiuswei wamd gabe pirowane k n gagutsig kuibe, m imbe  yamay maram nrrun cha k rr misrig k n: “Nabe kat le pirowane k n gagutsam nrrun cha, trurrigu pirowand  k m t , sr mbalameranba nau.” ²⁷Tru, “kat le k n gagutsam nrrun” cha, tru trendaibe, tru ka mara p nsraindeel  k n gagutsilane kerranrrab kui t rgand  eshkan, tru k n gagutsamgail , truil t  p nrrabig p nrr nrrai. ²⁸Inchawei tru nam ashib t ga purramig tru k n gagutsamgaigwan nambe utab kuig k bene, nambe ‘mayanguen ungua, ungua’ chigun, Tiuswan tab kui wanrrai mar ppe, nun k riibala tabig waminchib, kan yeeg tabig k nrrabmab isub. ²⁹Kaguende namui Tiusbe kan nag lataig k n, chigucha k rr misraingaug parr big.

Cristoieløbe mandø amønamiġ

13 ¹Ambugurri igurri undaarabig undaaray, kan trag nunelø lataitøwei. ²Ñimui yau asiimeelø pubelan tab wamab ya pebamigwane pesannamøtay. Kaguende mōiløma øyamay marøb meløwa, ångelesmeranguen ya pebøbelø køn, chi truilø kuitamab isumøtø.

³Katø kailan keeri yau purrabelane ñimbe nømbe kanbalatø keerig purrøwa lataitøwei isub, katø kaig indinab melabelane ñimun treeg indi lataig isumig køn.

⁴Kasharamibe purø tabig købig kui mayeeløba treeg isua tøgagøb, katø kasharawarmerabe nømui kiainuube mu pegwan pera kiamig kømøtø køn. Kaguende møg lata, ishug lata trømbøig marøbelanba, katø itøluløpteelanba, Tiusbe nømun maig kønrrabigwan asha martrab køn.

⁵Ñim amønippe, anwane ke chinchimmørø chull inchib amønimøtø, ñim mōi maig tøgagúitøgatø tab kui mørøb kasraatø amønamiġ køn. Kaguende Tiusbe trendaig kuig køn:

“Managuen ñundø elachimøwei,
chinchibgucha tsunrrai managuen ñun tarømisrmøwei
indamønrrun” cha.

⁶Inchawei øyeeg taig købene, nambe treeg kønrraitamab isua, chi isumø trenchinrrun:

“Nan purugubiibe Señor nø køben,
nabe chigucha kørmumønrrun cha.
¿Møøbe nane chigúi martrautah?” cha.

⁷Tiuswei wamwan ñimun waminchib, ñimun pera marøb pønrrabelane isua kømig køn. Nømui tru tabig amønaiġu asha kusrenrrai mandø tabig kørrømarig købigwan tab isua asha, tru nøm isubigwan Jesucristoinug pasra mandø tøgagúigwane treetøweih tøgaguy.

⁸Jesucristobe merrabsrø lata, mōiyan kwaløm lata, katø managatig nøbe yunømarmfiġ, treetø køn. ⁹Chigøben peemaytø kusrenaniilø pesrøteeløtøga amburab iburab srua ambiilø kønrrab kømøtø kuy. Pøs namui manrrømera Tiuswei tru ka yandø tab indiitøga mur pønrramigwan utiibe tabig køn, tru chi mamimeran manrrai karua pønrrailan marøb megaig lata kømøtø, tru øyeelan mariibe chiweingucha chi purugumeelan.

¹⁰Nambe kan altar tøgaguer tru Tiuswei carpa ya tabzhigu marøb pønrrab sacerdotesmerabe tru altaryuigwane mamig kømfiġ. ¹¹Pøs tru maya sacerdotesmeran nø karub sacerdote tru, “Kerriguwan Tiusweindiġ Kønrrain” tannug tru animal kweetsiilai aniwane tru kaig mariilaimburø tranrrab umbusrø srua kebyaindøgucha, tru animal kwaigwei asrmerane nøm warainukkurri nørøsrø srua webamba, parrilø købig køn. ¹²Inchawei treetøwei Jesúskucha ciuda yaskabyugurri wambig nørøsrø kwaig købig køn, nui anindøga Tiusweindø kønrrai misaameran chish martrab. ¹³Inchawei namgucha nuimay nun katønrrab

webangun ciudaygurri wambig nøørøsrø, nun maig trømbøig indinab megaigwan namgucha treetøwei kaig marinab melønrrab. ¹⁴Kaguende nambe yu piraube kan ciuda managatig pasrab pasrønrrabig chigar kua, nambe tru attrabigwan lab ker. ¹⁵Inchawei Señor Jesucristogurri chu urastøgucha Tiuswan nam animal kweecha lataig tranøppe, purø tabzhig wamindiilø trangun, nui munchiwan tabig wamindi wam tru trigugurri webarrubiitøga. ¹⁶Ñimbe tabig maramigwanba, ñim chi tøgagúigwan pirishib kømigwanbabe pesannanrrab kømø melay. Kaguende kweecha tranøb lataitøwei Tiuswan keta tranilø øyeeg traniløbe nø purø tab kui wanrrai marøbig, treeg køn.

¹⁷Ñimun pera marøb pønrrabelane maig karuigwan mørøb, nøm maig chiben treegwan melay. Kaguende ñimun chi kømønrrai chu uraskucha ashibeløbe nømwein køn, nømui chi mariilan nøm Tiuswan eshka pønrrønrrabelø kua. Nøm maramigwan marøb melappe, kasraatø, chi isuin kømøtø, marøb kønrrai inchigay. Kaguen trengømuiruandøbe, ñimune chiguen chi tabig kønrraamøn.

¹⁸Namuimburab ñim Tiuswan miarrunrigay. Pøs nambe namui isub kebachib pasrabigu chi 'kalø køn' chibig chigar pønrrab, katø chiyutøgucha nambe tabig marøb melønrrab isua meler. ¹⁹Nabe ke tiusmanda Tiuswan miab kørrunrigay chinrrab inchar, na peba ñimuisrømay katøle arrumig kønrrai.

Patsøgønrrab srabe wamindiilø

²⁰Tru chi isumgaig tab købigwan tøga Tius, tru managatigwei acuerdo mari anindøga tru Ubishameran Ashibig purø nuig, namui Señor Jesúswan kwailai utugurri kusrubiibe ²¹tru nø maig maramig palai waigwan martra chigurrimbunø tabig palabigwan ñimun tranrrun, Tius nø purø tab kui ashib wamig kønrrai Jesucristogurri namuinug nø marøb pasraitøga. Jesucristone managatig tørguegwalmabig kønrrun. Treeg kønrrun.

²²Na øyamay melamig køn chib wamindi wamwane, nai nunelan, tiusmanda tammay utørrunrigay chinrrab, pøs nabe landøtiig pørar. ²³Namui nuneg Timoteobe kailan keeri yaugurri webyain kui ñim wammøra kønrrai inchar. Incha nø petø arrubene, nabe nøba ñimun ashchab arrumønrrun.

²⁴Ñimun ashib pera pønrrabelø mayeelanba, katø mayeelø Tiuswei misaameranba 'tab ka amøñiguh' tan chirrunrigay. Katø italiasreeløgucha ñimune 'tab ka amøñiguh' cha øran.

²⁵Tiuswei tru ka yandø tab indiibe ñim mayeeløba pasrønrrun.